



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

39. Kalenderwoche – ab 27. September 2009

Hinnorwäldlor

Nee, mir in Gemnidz dun wer glisch irschendwie immor e bißl hinnorhähr hinkn. Mir sinn nisch off dor Heehe dor Zeid! Bei uns diggn de Uhrn irschendwie langsamor. Mir sinn Hinnorwäldlor.

Bei uns sinn de meisdn Gasdschädädn nisch bloß unnor dor Woche leer, nee, ooch Sonnahmdsahmds machen die schon um elfe dischd, weil keenor da is.

Mir Gemnidzor gehn ooch nisch zum Einkoofn in de Siddy, sondorn nach Rehrsdorf. Weil mor dord de Barkgebiehrn einschbarn kenn. Dähn Briehl hammor seid dor Wende links lieschn gelassn. Na, is doch so. Am Anfang nach dor Wende warn dord noch genieschend Geschäfte un Gasdschädädn da. Abor mir Gemnidzor sinn ehm nisch mähr hingegang.

Isch gloobe, wenn de allgemeine Wirsdchaftsgriese nisch von alleene nach Gemnidz gekomm sein däde, da häddes gladd bassiern kenn, dass mir in Gemnidz erschd eene Griese gehabbd häddn, wo annre schon lange widdor Offschwung machen dun.

Guhd, dass mir in Gemnidz noch keen Amogleefor an eenor Schule haddn, das will isch ma jedzde nisch als negadief bezeischnen. Un ooch dor geringfiegische Rauschgiftdumsadz machd mir keene Sorschn. Abor sonsd so... de Seeschnungen dor Freiheit dun uns immor sähr schbähnd erreischn.

Meine Gudste sachd, dass das ooch sei Guhdes hamm däde. Abor manschma kommsch mir ehm hier eschd vor wie in Hinnorwald! Zum Beischbiel ooch - da machen se nu in Reischnbrand im "Haus des Gasdes" - da machen se jedzde "Fresdling". Also, das duds in Ameriga un annerschw

schon viele Jahre gähm. Wo die sich in so eim Boxring wie de Wildn geeschneidisch vorbrieschln dun. Ja, "Fresdling" heeßd das. Mid eim "W" vorne wird das geschriem.

Wennde das im Fernsähn siehst... also, isch kann da nisch hinguggn, wie die sich da beaggorn. Die dun sich off de Kebbe hubbn mid de Kniee, un mid de Fieße ins Gesischd... die dun sich behandln, wie e Koch e Schnidzl, was nisch weesch wern will. Abor es dud kee Blut fließn.

Dadermid fang mir nu in Gemnidz mid einische Jahre Vorschädung ooch endlisch an. Na, de Juchend brauchd doch e bißl Anreeschung fiehr de Brudalidäd. Immor bloß im Fernsähör is nischd. So in Leif is Brudalidäd viel scheenor! Ooch de Fraun dun ja in de ledzdn Jahre ganz scheen midmachn. Boxn un ooch "Fresdling"! Bloß keene Gemnidzorin!

Abor ehm, während mir nu mid "Fresdling" in Gemnidz anfang, gibbds schon lange was noch viel Bessres. In Hambursch un annerschwo is das längsd in Mode. Das is so was "Fresdling" abor mid Blut. Da dun die sich werglich rischdisch geeschneidisch maldrähdiern, bis das Blut schbridzn dud. Ooch Arme dun breschn, un Bladzwundn, un Geniggbruch... isch hab geheerd, dass die sich abor irschendwie doch noch am Lähm lassn. Mähr odor wenischor mid Absischd. Isch weeiß nisch wie das heeßn dud un isch weeiß ehm ooch nisch, wies genau ableefd. Abor wohähr soll isch das ooch wissen. Mir sinn in Gemnidz ehm widdor dodal hinnorhähr.

Eduard Sachsenmeyer